

LA TIBIA DAL BARBA POL DALLA LIVRADGA

dond s'intend' al numer del putt e di ragazzun
ch'ien sta aidar a battr' al furment in s'l'ara
e far al paiar, e tutt quel ch' s'usa d'far
da i cuntadin, quand i battn al furment
ditta in t'al so linguaz.

BARBA POL CHIAMA LA SO FAMEIA A LAVURAR.

Barba Pol

Lieva su, Tunin,
E chiama Iachmin,
Ptruoni e Battston,
Minghin e Francescon,
Zannin e Galiez,
E tutt qui raghiez;
Su, ch l'è livà al strelot.

Tunin

Livà su, ragazzun,
E n'fad più i pultrun,
Su ben, ch l'è l'alba chiara,
Ch'al bsogna mettr in ara
N'stad più a sdurmiazar.

Iachmin

Eh, Tunin, lassm star,
Ch'a iho una son, cha crod.

Tunin

A chi dighia mi, t'n'od?
Sta su, ch' puost crepar,
Stal mo li a schurzar?

Iachmin

L'è segnal, cha iho padì,
E per quest a tiegn ussì
Es me dol un po' la testa.

Tunin

Oh st'è la bella festa,
O guarda ch' purcaz
Ch' caga d'asnaz
Mo s'a t' viegna li, chi sì
Ch'a t' fo saltar su mi,
Testa de ghiandarot,
Guarda ch zuvnot,
Da far del facend,
Chi sì ch'a t' dstend,
St' mang da furcà
Pr ados, tien pur suppià.
A chi dighia, va' ben dria
Ch diavl hat de dria,
Sintì un po' che gaiof,
Ch tira cert slof
Da far plar' i can,

Va' a star in tal paltan,
E n' qui fra la zent;
Ch'sì ch'a t' rsent,
N'finis st'cuntrat.
O lieva su in tun trat,
E n'fat ch'alza la vos.

Iachmin

O ti è pur fastidios,
Po' far cha n'dig al mond
Se ben an t'arspond,
A t'od ben sbraiar,
Che t'puost affugar
Una botta, vuoial Dia,
Tuotm mo' un poc d'dria,
E n'm'star più a insturnir.

Tunin

Iachmin, n'm'far vgnir
In biestia un poc mo mi.

Iachmin

Mo a son più biesta d'ti,
S'l'ha andar da biesta a biesta,
N'm'dar più muliestia,
E n'm'star più agrzar,
Ch'am chminzarò a livar
Dam un poc al mia saccon.

Barba Pol

Osù, tus, und'è Piron?

Piron

A son qui, cosa vuliv?

Barba Pol

Al bsogna un po' t'arriv
A chiamar sti fiua,
Chi z'han d'aidar anchua
A battr, osù, va' via,
A chi dighia, mov'i pia.

Tunin

E mandai Galiez.
Che qustù è un balurdez,
Che n'sa far un'ambassà.

Barba Pol

Vai ti donca de tirà,

Galiez, e n'durmir.

Galiza

A vo via, mo c'ha a vgnir?

Barba Pol

L'ha vgnir Zech e Sandron,
Tugnaz e Salvestron,
Battstella dal fussà,
E Minghet so cugnà,
Luchin e Mingarel,
Santin e Mattarel,
Bernard e Tmasin,
Flippet e Burtlin,
Nichlò dall'Ulmadel,
Pirin e Stvanel,
Tugnon e Lurinzin,
Bastian e Gasparin,
Biaset e Francescon,
Bdet de Barba Ton,
Simon e Salvador,
Dunin e tut qolor,
Po' va', chiama l' put,
E di ch' l' viegnin tut.
D' primis chiama la Rossa,
La Zanina della fossa,
L'Anzlina de Masin,
La Flippa de Marchin
L'Andriina dal srai,
La Masina de Barbai
La Nichlosa dal buschet,
La Nanina dal tett,
La Pluonia de Barbon,
La Muretta de Piston,
La Minghina dal canal,
La Minozza de Pasqual,
La Bernarda de Galvan,
La Biasina de Mignan,
La Sandrina dal pradel,
La Tadia dal mattarel,
La Dratia de Barba Ton,
E la Iacma del canton,
La Nanna d'la Custanza:
L'è ver ch l'ha la panza
Grossa da far fiuò,
Che questa t'la può
Pr ades lassar a chà,
Osù, camina e fa
Che tutt viegnin via,

Con l'forch e i sua rastia,
Da pser vultar la paia.

Galiaz

Mo sintì Lion ch'abbaia,
Chi dien esser fuorsa lor,
Perché a sent un gran rmor,
Eni diss? Si chi ien.
Alla fè, chi han fat ben
A livarm sta fadiga
Ch sa vli pur cha va l' diga
Am truvava avluppà
A chiamar tanta brigà.

Barba Pol

O a son ben ti è un galavron,
Os va' all'olla zermison,
Ch' t'ni è bon s'n' da pacchiar,
E da star a sdurmiazzar,
Ti, e quel lov d'Piron,
Chal ie vurev un bon zanghion
A scussart a ti, e lu
Al gabban, ch tut du
N'havi brisa d'zervel,
Vai un po', avr al rastel,
Ve Tunin a quij fiua,
E ti va' gverna i bua,
E tuotm un po' d'qui.

Barba Zech cun i altr cumpagn dis
Barba Pol, a v' do al bon di.

Barba Pol

Ben vgnu, sta cumpagnia.

Barba Zech

A sem qui tut' alla via,
Con l'forch apparchià.

Barba Pol

Sia' pur tut ben' arrivà,
O vgni via ch'a sem di fet,
Sti pultrun iern' anch a let.
Es n'vlevin livars su,
Osù, pur n'sten zà più,
Chminzen un po' a purtar
Fuora i cuov, ch'al m'par
Che sta tibia andarà ben,
Prché a veg un bel sren,

Cha n'faren supp' altrament,
Para via Tunin valent,
Ah, Sandrina valurosa,
Ch'at vlen po far la sposa,
E ti, Flippa, e ti Anzlina,
Purtav ben in sta mattina,
Ch'av vlen po dar mari.

Sandrina

A la fè a n'in vuoi za mi,
Ch'an vuoi ma lassar mi mar.

Flippa

Oh, vgnés un ch tal vles dar
Pr vder st' l'agaffaris.

Sandrina

Sì ti fuorsa al bcaris,
Mo mi mai n'in vuoi nsun.

Flippa

A so mi di ragazzun
Ch t'andarevn pr al fasol
Masmament Tuniol
T'm'intiend ben po ti.

Sandrina

Osù pur finenla qui,
E attinden a lavurar,
Ch'al n'è temp d'chiachiarar,
Né attendr a l'zanz.

Barba Pol

Ah, gaiard inanz, inanz,
Su Ptruoni, su Piron,
Sabadin, ti è un gran pultron,
T'n' pua livar un cuov.

Sabadin

Mo l'è gros quest cha mov,
Es pesa' a dramon,
Sintì quest, barba Ton,
E lival su, sa psi.

Barba Ton

A la fè, chi en ben granì,
Es ni è ne luoi né vezza.

Pluonia

Al m'casca zo una trezza,
Asptà, ch'am l'arcuoia.

Barba Pol

Cridà un poch a qula Truoia,
Ch la va attorn l'spigh,
Dai un poch barba Bigh,
Cun quel mang dal badil,
Iachma, parla in tal purzil,
Cun qui eltr purzlin,
Va' qui, truoia, und'è Zanin?
Ch'al t'viegna un poch aidar.
Dai ch la cor in tal pular,
Osù, serra mo l'ussol.
O fiuua iè più furment
Da purtar, oh a si valent,
A l'havì za mo' finì
D'mettr in ara, osù vgnì,
Cha farem mo qulation,
Cha psama star in ton,
Cun l'è ora de vultar
Intrà sotta Cavallar,
E tuccà su l'caval,
S'a vlì po manzar al gall.

Cavallar

Andà pur tutt a pambrar
Ch'av psà po dmnar,
Cha iho rot mi la paia
Che la tibia vaga gaia.

Barba Pol

Osù, fiuua, vgnì via tut,
E fadi luog a quel put,
Sdì qui, barba Silvestr,
Osù, don, purtà al mnestr,
Cha chminzan un poch a sbattr,
Cha pren miei po attendr a battr.
Dì a la Ghida, ch porta al pan,
Battstin crida a quel can
Ch'al n'pia quel puvret.

Battstin

Te Lion, chiamal Bdet,
Dai un po' una bastunà,
Tira qui, sipt ammazzà.

Barba Pol

Sdì mo zo un puchtin,

Mett qui l'orz, Iachmin,
E po dam qual scudlot,
Prchè al pan è un po' durot,
E mi n'ho dient d'dria,
Es m'dol una zinzia,
Chal mtro' in tal vin a mui,
Ch'an poss s'ben a vui
Ma biassar ben i bcun
Sa ni mett a un a un,
A masrar in la scudella,
N' s'è fatt d'padella?

Ghida

Msier sì.

Barba Pol

Mo porta qui
Quel chi è, potta d'mi,
T'sta li t'par incantà,
Mo d'grazia fiuua arrivà:
Fat inienz, Tuniol,
Manza ben, l' mi fiol,
Dam un poch in za al butrig,
Av fo brids, barba Big.

Barba Big

A l'azzet, av fo rason
At fo brinds, Battston.

Battston

Bon pro ve fazza, e mi al vuoi far
Qui alla Pluonia, sal ie par,
Cha ial fazza,

Pluonia

Fad pur su,
Ch'ancha mi, cun dis qulu,
A l' farò a un de qustor,
Brinds donca, Salvador.

Salvador

Dam da beber, Galiaz,
Osu, Rosa, mi ve l' faz.

Rosa

Fadal pur li alla Flippa,
Che mi n'so dund am sippa,
Prché quest è un asn vin.

Salvador

Va' l' anacqua, Iachmin,
Prch' a sent cha iho cald,
Es n'so sa tegnarò sald,
Cha n'faga qualch chias.

Barba Zech

Va', camina quatr pas,
Ch la t' purev un po' passar.
Volta in là, s't'vua bussar
T'n'me dies la scazzà,
T'ha vlu tgnir sbevazzà,
Es n'ha manzà quattr bcun.

Salvador

Mo a v'ho tut pr cavrùn,
Sa vli dir cha sia imbrìag.

Battston

Osù, tirat su le brag,
Che l't'van a campanella,
Ch'al ni è qui ngun ch' t'usella,
Ch'at sen tut quent amigh,
E la colpa è del butrigh,
S'ngun pur l'ha d'aver.

Barba Pol

Battston ha dit al ver,
Vat posà un puchtin,
In s'la tiezza, e stai insin
Che l'è ora de vultar,
Ti t'poss po travaiar,
Con la forca ancora ti.

Barba Zech

Mo l'è miei t'fag quisì,
In t'ugn mod al Cavallar
Ha climenz poc fa a parar
Su a la tibia le caval.

Salvador

Osù, a vag, barba Anibal
Vgnim dgrazia po a dsdar,

Barba Anibal

Va' pur via, e n'dubitar,
Po l'ha pres la simia prest,
Mo al farà la su dal rest,
E fra un poch a n'arà mal,

Mo quest'è un cattiv sgnal,
Cha i ho pora con st'vin
Cha n' fagan di babbuin:
E s'a fen, cm'aven chminzà,
A srem tutt' avluppà,
E Dia sa com l'andarà.
Mett un po al butrig in là,
Ch'anca mi n'm'cuses
Perché a sent infin' adess
Ch'a iho un poch cald al zuccon.

Barba Pol

Osù, tus, alon alon,
Su al forch, i mia fiua,
A vultar un po' i paiua,
E astav cun rason,
Una putta e un ragazzon,
Sabadin cun la Zanina,
Salvestron cun la Masina,
Tuniol cun la Tadia,
Tmasin cun la Dratia,
Mingarel cun l'Anzlina,
Battstin cun la Sandrina,
Niclò cun la Muretta,
Paulin cun la Sabetta,
Stevanel cun la Nannina,
Andriol cun la Russina,
Gasparin cun la Niclosa,
E Burtlin cun la Rosa,
E ti, Flippa, vien quì qui,
Cha starem da ti e mi,
Osù, via d'man in man,
Cun i vostr ordegn in man,
Saltem tutt alla sbarai,
E a rcuoier su la paia,
Cumparisca Cavallar,
È anch ora de vultar?

Cavallar

Chminza pur, arcuoier su,
Va' là rossa, tru, tru, tru,
A chi dighia mi, Pumada?
Qula ruana s'è imbalzada,
Para via, va' là, murella,
A t' darò ve campanella,
Va' là baia, via Fruntina,
Via Liarda, via Bianchina,
Via Muscada, via Brunetta,
Su, Cuntina, su Muretta,

Ah Galanta, ah Favurida,
Su, ch' la paia è oma' finida
D'artaiar la prima man,
A la fe', ch'a i srà dal gran.
Osu, pr ades a z' fermarem
St'altra mnada a finirem.
Pia qui st'cavall, o là,
Ferma Bisa, sta, sta, sta,
Cha turren quattr bcun
In st'mez 'sti ragazzun
I daran d'sott' in su.

Barba Pol

Andà via, n'stad più
E buvì alliegrament,
Cha darem mo nu al furment:
Osù via, 'l mie mamlel,
Spinzi ben d'bon budel.

Sandrina

Battstin, lassam star,
E n'm'star a pzigar,
Ch'al n's'finirà la festa
Ch'at rumprò la testa,
Con sta forca, e s'al farò
Cha tal dig o requia mo.

Battstin

Osù, tas, e n'far rmor,
T'sa ben, ch'a t' port amor,
E ch'a pres a vler ben
In tal pra' sgand al fen.

Sandrina

A dig t'viv e t'las vivr,
Ch'a t' darò s't' non la livr.

Battstin

Osù, matta, di più pian,
Ch'a n' l'ho fat a bella man.

Sandrina

A n' t'so dir tant parol,
A l' vuoi dir a barba Pol.

Battstin

Ch' cos hat, di, ruvidazza,
Cridla mo' sta rustgazza,
Pr haverl' un po' tuccà

Cha n'm'in son po nianch adà.

Barba Pol

Battstin, n'far al zegn,
Cun l'don di cumpegn,
Masmament cun tal' e qual
T'n't' tir ados un pal.

Battstin

L'è qustia ch crida qui,
Es n'so zà prché mi.

Barba Pol

Osù via, cha 'l n'è nient,
Lavurem aliegrament,
Dai ben li l'mia fiol,
E buttà su quel paiol,
Niclosa, volta li,
Iachma, aidai ancha ti.

Iachma

Mo i m'tran ados d'la paia.

Barba Pol

Osù, fiua, finì sta baia.

Franceschon

Porta un poch in zà al buccal,
Cha m'bagna un po' al canal.

Barba Pol

Finem prima de vultar,
Ch'andarem tutt' a disnar,
Es bevrem po comdament
Dai ben via, su ben valent.

Franceschon

No, no, dam pur al buttaz,
Vamel, porta, Galiarz,
O ch'a l' turò mi, dund'el?
Perché a i ho una sed ch'a sfel.

Bdet

Bev poch, Franceschon,
T'n'vag in balurdon.

Franceschon

Lassam beber quant' a vuoi,
Cha in burev' ades un suoi.

Bdet

Da mo qui, n'bever più,
Sì, sì, leva pur in su,
Ch' vuot zugar, imbriagon,
T'farà qualch maron?

Franceschon

S'a m' imbriarò, mia dan,
N't' piar ti tant' afan,
Ch' m'a sent ch'al vin m'agriezza,
Ancha mi corr a la tiezza.

Barba Pol

Osù, zà, ch'avem vultà,
Mamlel, andav pusà
Sott al portegh, ch'al m'par
Ch'al sia ora d'dsnar.
Cavallar, aviv manzà?

Cavallar

Msier sì, e s'ho livà
Quattr bot in su al fiascon,
Ch'av prumet ch'a son in ton.

Barba Pol

Osù, donca, a psi andar
A finir d'tibiar,
E sgranar l'spigh ben,
Ch'ancha nu po turnaren
Com'aven bvù in t'un trat
Es farem quel ch va fat:
O vgnì a tavla, ragazzun,
Su ben put, su ben garzun,
Sedi zo, e n'fad bai,
Taia un poch qual furmai,
Ch liè d'quel ch'aven in l'olla.

Burtlin

Mi vurè d'la civolla,
Tram quella vè, Piron,
Mo n'tor al zermion,
Tient ancora le scarsui,
Che mi n'vuoi i tuo rsui.

Piron

O a so mi, ch t'va in si lez.

Barba Pol

Osù, tua d'st'furmez.

Burtlin

O l'è bon, potta de mi,
Damn' un po' una fetta qui.

Barba Pol

L'è d'quel, sat Zampier,
Che fiè la vacca d'mia muier.

Zampier

A la fè, sì ch'l'è bon.

Tunin

Mo t'tai sì gruos taccon.

Zampier

Mo l'è stà st'curtlaz,
Es n'ho psù rtgnir al braz.

Tunin

Sì, a so ben ch ti è balord.

Barba Pol

O Piron, ti è trop ingord,
Manda in zà quel lasagn,
T'm'par un mal cumpagn,
T'n'ha manzà squas un cadin,
Senza darn a tua vsin,
T'vua ch'al t'tira po la panza,
Tuo' sta po di carn ranza.

Piron

A n'vuoi carn ranza, mi,
Ch la m'sta in gola tutt' al di,
Dla torta a in turò ben.

Barba Pol

Vetla a punt qui, ch la ven,
Ch l'è qui la zea Nicola
Ch la porta in s'la rola.

Tunin

Zea Nicola, vgnì ben via.

Barba Pol

O tusuot, tgnì in là i rastìa,
Ch'al z'la bisogna cumpartir
Ch'al ni sia po da rugnir.

St è al pzol dal cavallar,
Vaial' porta, e n'al manzar,
Asptà, quent senia tut?

Tunin

Vintidu, senza st'put.

Barba Pol

E st' put s'grattaran,
Che sta botta l' n' n'haran.

Zea Nicola

A in darò ben po' mi,
Dan pur vu a quisti qui.

Barba Pol

Osù, asptà, le mie fiol,
Ch'a v' darò al vostr pzol,
Es l'è poch, n'crìdà,
Prch' a sen troppa brigà,
Tua al buttaz, vè Piron,
E tra d'quel lì dal canton.

Tunin

Al vien via, es par ch'al buffa,
Oibò, ch' l'ha la muffa.

Barba Pol

Mo de qual hat cavà?

Piron

D'quel vassel, c'haven cumprà.

Barba Pol

Al malan ch' Dia t'dia,
Osù, tornal pur in dria,
Van tra' ti, Galiez,
Che qustù è un balurdez
Che n'val un bagaron,
Mi n'vist ma' più al straminchion.
Al fiè quì l'altra matina,
A dig: "Portam la guaina",
Al me porta un falzinel,
Guardà vu se l'ha zervel.
Osù, bvema tut un trat,
E po' andema a far di fat,
Osù, alt i mia tusot,
Salvador, iet anch cot?

Salvador

A vagh anch un poch intorn,
Mo a son stà lì, dop al forn,
A slargarm un puchtin,
Es ho fat quattr ninin,
Tal cha m' sent mo in zervel
Es farev un saltarel,
S'al ie fus un sunador.

Tunin

Osù, inienz, Salvador,
Ch'a vlen far al paiar.

Salvador

Andem pur po' far mi par,
Ecchm qui tut garbà.

Tunin

Chminzem qui da st'là,
Ti Ptruoni, e ti, Mingon,
E ti, Bdet, e Batiston,
A farì al paiar, e nu
V'trarem la paia su,
Su, tusuot, inanz, inanz,
Spinzi su, n'fad zanz,
Dam paia, su brigà,
Buttà su qula furcà,
Vgnì via con qual bel mont.

Iachmin

Al m'è sta accolt in la front,
L'è sta una de st' tos,
Mo a vuoi essr so mros.

Barba Pol

Osù, via, n'chiacchiarar,
Ch'l'è orma' fat al paiar,
Fai ben su la bella punta,
Tuo' sta paia, e dai zunta,
Fal pulid, car fradia,
Ch'al par pendr un poch indria.

Bdet

Al farem ben tutt'ugual,
Faz pur dar un po al buccal.

Barba Pol

Dai qui l'orz, Iachmin,
Osù via, da paladin,

Cha finema sta facenda,
Ch'andarem po' tut a mrenda.
Osù, fiua, al paiar è fat,
Arcuien mo ditt' e fat,
Su la massa dal furment,
Spazza ben qui, ti Nuzent,
Dai li dria con la granà,
Vien qui ti, cun quel cutà.
A chi dighia? Vè ch'alloch,
Para ben su li quel loch,
Ch'al n'vaga a mal al gran,
Ch'in dsiv, barba Galvan?
V'avrissi ma' pinsà
Ch'al sin fuss arcolt mà
Una massa quisi fatta?

Barba Galvan

Mi cred ben cun la srà tratta,
E ch la srà ben svintlà,
Cha ihari dal gran assa'
Lassà pur frapar chi frapa,
Ch'al darà cinq pr cappa,
Over quatr e mez almanch,
Es è bell, gross e bianch,
Al i è un poch de ghiutton,
Mo al vien mo' da la stason
E po quel ni fa nient,
Ch'in tal pan a n' si sent.
Basta, l'è una bella massa,
Es zugarò ch' la passa
Del corb dusement e più,
Sal i è nsun ch' metta su
E i viegna la muria,
A ch' vol la carastia,
Ch'al iè al mond ciert avarez,
Si n'havesn i palez,
I granar e i magazzin,
N'pinsà chi sien ma' pin,
Es vurevn ch'un granel
Vales quant un gran castel
E po', quand ijn al fin
Al ie resta li i quattrin
E al furment in si granar,
Ch d'là i n'al pon purtar,
E in tal far di testamient,
I la lissan a certa zent
Ch n'suffrissin, al vuoi pur dir,
Ch'is portn a suplir,
Chi chmenzin a triumfar

A sguazzar, a squaquarar,
E quel misr, quel avaron,
N'manzò mai un bon bcon,
Pr tgnir l'arzent stret,
Es n'aveva al puvret
Mai attorn un buon gaban,
L'è ben ver che nu villan
Tren al graffi vluntiera,
Es andem spes a Rubiera,
E alla fiera de rampin,
Mo s'avem un bulgnin
Al spinden alliegrament,
Es n'fen cun fa sta zent,
Ch n's'impin mai al gos.

Barba Pol

Os' lassem andar st'cos
Zà ch'aven fat al paiar,
E ch' la massa è mo da trar,
A turen quattr bcun
D'insalà cun di zdrun,
Dal furmai e dal per,
Ch'altr qui n'psen haver,
Ch'in vrà più s'n'agurarà.

Barba Zecch

Pol a vlen andar a chà,
Fa un to cont ch'appan mrindà,
Ch' l'è poch ch'aven manzà.

Barba Pol

Osù, n'fen st' bagatel,
Sdi zo, le mij mamlel
E tuli du bucunzia,
E arrivà lì a quij piattia,
La n'par unta, st'insalà.

Ghida

L'è ch' la n'iera ben sguzà,
Mo asptà, cha ijn metrò.

Barba Pol

T'al but via, hos basta mo',
La sta pur miei un puchet,
T'n'arriv qui Bdet.

Bdet

A iho sed, mi barba Pol,
Iachmin, damn un miol,

Ch'am voi po amular a cà.

Francescon

O Bdet, und s'va?
Ch n' z'asptav anca nu.
O mamlel, livà mo su,
Ch l'è ora d'marchiar.

Barba Pol

Lassail anch un poch star,
Potta d'mi, ti è si frzos
N'v'partì, le mie tos,
S'a vulì far un ballet,
Cha farem vgnir Marchet,
A sunar al so stuffel,
Es farì un saltarel.

Barba Zech

Pol, al bsogna andar a chà,
Che 'l bstiol aspettan là
Cha'l si vaga a far d'la fuoia,
St'mamlel aren ben vuoia
D'scussar un po' al grimbal,
Mo l'è tard, quest' è al mal,
Es patirè el vacch,
E po' agnon è mez stracch,
Al faren po' un'altra botta.

Barba Pol

O, bvì almen un'altra botta.

Bdet

A dig ch'al bsogna andar,
Su, chminzav un po amular:
Menga, mena via st'put.

Barba Pol

Osù, fiua a v' ringrazi tut,
E sa si sta mal trattà,
A sta tibia, cm' a turnà
A quest'altra, ch'a farem
Fuorsa miei v'ttrattarem.

IL FINE

Schema metrico: distici di ottonari in dialetto bolognese.

Testo trascritto da: **LA TIBIA | DAL BARBA | POL DALLA | LIVRADGA | FATTA DAL
CAVAL. | Dou s'intend al numer del Putt, e di Ragazzun ch'ien | stà aidar à battr al furment
in s'l'ara, e far al pair, | e tutt quel, ch's'vsa d'far da i Cuntadin quand'i | battn al furment,
ditta in tal sò linguaz. | DEL CROCE. | [xil.] | [linea] | In Bolog. presso gli Heredi di
Bartolomeo Cochi, | al Pozzo rosso 1621. | Con licenza de' Superiori.**

Testo trascritto da: *La tibia d'barba Pol dalla Livradga, dond' s'intend' al numer dal putt e di ragazzun ch'jen sta aidar a batter ai furment in s'l'ara, e far al pajar, e tutt' quel ch's'usa d'far da i cuntadin quand i battin al furment, ditta in t'al so linguaz,* di Giulio Cesare Croce, in Bologna, per Gaspare de' Franceschi alla Colomba, s.d. BAB